

Headline	Bakau minyak terbesar selamat		
MediaTitle	Berita Harian		
Date	05 Apr 2012	Color	Full Color
Section	Nasional	Circulation	192,982
Page No	18	Readership	1,521,000
Language	Malay	ArticleSize	274 cm ²
Journalist	N/A	AdValue	RM 9,241
Frequency	Daily	PR Value	RM 27,723



Bakau minyak terbesar selamat

Projek konservasi mula Mei ini

Oleh Syed Mohd Ridzuan Syed Ismail

PONTIAN: Sebatang pokok Bakau Minyak (*Rhizophora Apiculata*) berusia lebih 100 tahun yang diancam hakisan pantai serius di Pulau Kukup dekat Tanjung Piai di sini, akan diselamatkan menerusi kerja konservasi bermula Mei depan.

Bakau Minyak dipercayai terbesar di negara ini dengan garis pusat 57.1 sentimeter (sm) atau ukur lilit 1.79 meter itu berdepan risiko tumbang berikutan kedudukannya kurang 20 meter dari kawasan hakisan, mendapat perhatian beberapa syarikat swasta untuk membantu memulihara khazanah berharga berkenaan.

Pengarah Perbadanan Taman Negara Johor, Suhairi Hashim, berkata Kulim Berhad menyatakan persetujuan membantu menyediakan dana bagi membina cerucuk, batu penghadang hakisan dan jeti untuk menghalang pergerakan tanah sekitar kawasan pokok bakau itu.

Katanya, Malakoff Corporation Berhad juga mendermakan RM100,000 melalui Dana Pemuliharaan Alam Pulau Kukup bagi kerja konservasi pulau terbabit yang mengalami masalah hakisan.

“Mengikut kajian Universiti Tun Hussein Onn Malaysia (UTHM) dana sebanyak RM300,000 diperlukan bagi membina kemudahan bagi

menghalang hakisan daripada terus menyebabkan pokok tertua ini tumbang. Menerusi dana yang ada hasil bantuan beberapa syarikat ini, kita akan memulakan kerja penyediaan tender sebelum konservasi dijangka bermula Mei ini.

“Kerja pembinaan ini perlu dijalankan segera kerana kawasan itu kini berada dalam keadaan kritikal terutama kesan fenomena air pasang besar yang berlaku beberapa bulan lalu,” katanya di sini, semalam.

Pada 8 Mac lalu, akhbar ini melaporkan Pulau Kukup dekat Tanjung Piai yang tercatat sebagai pulau kedua terbesar di dunia tidak berpenghuni, mungkin akan kehilangan gelaran itu akibat keluasan yang semakin mengecil disebabkan hakisan pantai yang serius.

Hakisan itu juga menyebabkan kawasan hutan bakau di situ menyusut lebih 100 meter daripada keluasan sebenar sejak 10 tahun lalu. Malah, hakisan di pesisir pantainya makin ketara apabila air pasang besar, ombak besar kerana aktiviti perkapalan tidak terkawal dan kegiatan mencuri bakau.

Kajian UTHM dan Institut Penyelidikan Perhutanan Malaysia (FRIM) mendapati berlaku hakisan satu meter setiap bulan di kawasan

pulau hutan bakau berkeluasan 647 hektar yang dikelilingi dataran

lumpur seluas 800 hektar itu.

Suhairi berkata, pihaknya mengharapkan lebih banyak syarikat dan badan bukan kerajaan (NGO) tampil bagi membantu usaha konservasi bukan saja membabitkan Pulau Kukup tetapi bagi konservasi Taman Negara yang berada di bawah perbadanan terbabit.

“Untuk tahun ini saja sebanyak 2,000 pokok bakau ditanam di sekitar Pulau Kukup dengan kerjasama pelbagai pihak. Orang ramai yang datang ke sini juga boleh membeli anak pokok bakau dan menanamnya dengan mengabadikan nama mereka pada pokok terbabit,” katanya.



POKOK bakau minyak dipercayai terbesar di negara ini mungkin tumbang kerana terletak kurang 20 meter dari kawasan hakisan pantai di Pulau Kukup.